

Mid-Day Dogri News Bulletin, 13th July 2025

समे – 12:25

<><><><><>

एह आकाशवाणी जम्मू ऐ, हुन तुस पंकज कोहली कोला खबरां सुनो।

President

राष्ट्रपति द्रौपदी मुर्मू होरें चार मन्नी परमन्नी दिएं हस्तिएं गी राज्यसभा लेई मनोमीत कीता ऐ। राज्यसभा च शामिल होने आले इनें चार नमें मिनबरे च मशहूर वकील उज्जवल देशराव निकम, समाजी कार्यकर्ता सी.सदानंद मास्टर, साबका विदेश सचिव हर्षवर्धन श्रंगला ते इतिहासकार शिक्षा विद्वान डॉ. मीनाक्षी जैन शामिल न। गृहमंत्रालय नै इक अधिसूचना जारी करियै इस फैसले दी जानकारी दित्ती।

<><><><><>

Amarnath Yatra

जम्मू दे भगवती नगरा आधार शिविर थमां 7 हजार 49 श्रद्धालुएं दा इक होर जत्था सख्त सुरक्षा बंदोबस्ते हेठ श्री अमरनाथ जी दी यात्रा लेई घाटी आस्तै रवाना होआ ऐ। एह जत्था 286 गड्डिए दे काफिले च सोआर होईए रवाना होआ। इस जत्थे च 5 हजार 459 मर्द, इक हजार 423 महिला, 31 बच्चे 107 साधु ते 29 साधवियां शामिल हियां। इन्दे चा 2 हजार 891 श्रद्धालु बालटाल लेई ते 4 हजार 158 श्रद्धालु पहलगाम लेई रवाना होए न।

<><><><><>

Livestock Jammu

जम्मू संभाग दे पशुपालन क्षेत्र गी होर तगड़ा करने आली इक महत्वै आली कोश्ट तैह्त राई-बाई उत्पादन मैहकमे दे मुख्य सचिव शैलेन्द्र कुमार होरें तालाब तिल्लो पशुपालन निदेशालय च इक उच्ची सतह आली समीक्षा बैठक दी प्रधानता कीती। बैठक च कैपेक्स, एचएडीपी, सीएसएस ते नाबार्ड तैह्त होने आलिएं स्करमें दे तरक्की बाढ़े पर गल्लबात कीती गई। उनें जनोरें दा समें सिर टीकाकरण करने, करसान साथी पार्टल राएं डिजीटल रिपोर्टिंग ते बुनियादी ढांचा परियोजनाएं गी पूरा करने पर जोर पाया। इन्दे अलावा बैठक च डेयरी क्षेत्र गी मजबूत करने, सहकारिता गी बढ़ावा देने ते पारदर्शिता गी बढ़ाने दी लोड़ पर लोह पाई

गेई। अफसरें गी जम्मू संभाग च बेहतर पशुधन सेवा लेई जवाबदेही जकीनी बनाने दी अपील कीती गेई।

<><><><><><>

Cocoon Auction

खित्ते च रेशम विकास गी बढ़ावा देने दे मकसद कन्नै रेशम दे विकास सरबंधी निदेशक एजाज अहमद भट्ट होरें कल उधमपुर च रेशम दिएं खुब्टिएं दी बिक्री आले केन्द्र दा दौरा लाया। जित्थें एह्दी निलामी कीती जंदी ऐ। पैहली जुलाई थमां शुरू कीते गेदे खुब्टिएं दी निलामी दे सिलसिले च अजें तोड़ी ढाई करोड़ रपे दियां खुब्टिएं दा सौदा होई चुके दा ऐ जेह्दे तैह्त् 60 ज्हार किलो खुब्टियां दी बिक्री होई चुकी दी ऐ। खुब्टिएं दा भाह 16 सौ रपे किलो तोड़ी पुज्जी गेदा ऐ। निलामी गी लेइयै जबरदस्त उत्साह दिक्खियै इसी इक होर हफ्ते तोड़ी बधाई दित्ता गेआ ऐ। दौरे दरान एलाल अहमद भट्ट होरें बवस्था दी सराहना करदे होई सारी प्रक्रिया गी पारदर्शी ते जवाबदेह बनाने, करसानें दे हितें दा ध्यान रखने ते नमिएं तकनीकें राएं रेशम दे क्षेत्र क्रांतिकारी बदलाव दे लक्ष्य गी लेइयै कम्म करने दा आह्वान कीता।

<><><><><><>

Rangyug Chanchlo

डोगरी रंगमंच दे इतिहास च पैहली बारी जम्मू च 90एं मिंटे दा शानदार एकाकी नाटक दिखने गी मिलेआ। प्रस्तुति नै दर्शकें गी मोहत करी लैता ते खेत्तरी प्रदर्शन कला च इक महत्वपूर्ण मील दा पत्थर साबत होआ। रंगयुग आस्सेआ पेश कीते गेदे “चंचलो” नाटक ने जबरदस्त कारकरदगी, खेत्तरी भाषा ते समाजक रूप कन्नै जुड़ी दी कथा दे संयोजन कन्नै एकाकी कहानी कथन गी सब्बने शा अग्गे आहन्नेआ। अनुभवी रंगमंच शख्सियत दीपक कुमार आस्सेआ डिजाइन ते निर्देशित ते जम्मू कश्मीर कला, संस्कृति ते भाषाएं दी अकैडमी आस्सेआ प्रायोजित “चंचलो” नादिरा जहीर बब्बर दे मशहूर हिंदी नाटक “सकुनाई” दा डोगरी रूपांतरण ऐ।

<><><><><><>

Flood Mock Drill

राष्ट्रीय पन बिजली निगम एनएचपीसी सलाल पावर स्टेशन ते जिला प्रशासन रियासी आस्सेआ हाड़ें दी स्थिति कन्नै निबड़ने लेई इक मॉक ड्रिल अभ्यास कीता गेआ। डिप्टी कमीशनर निधि मलिक हुंदी अगुवाई व आयोजित इस अभ्यास गी पुलस ते केन्द्री थेआरबल बलें दे नेड़में सैहयोग कन्नै तोड़ चाढ़ेआ गेआ। मॉक ड्रिल दरान खतरे च फसे दे लोकें गी बचाने, मैडिकल इमर्जेंसी, डाक्टरी सहायता पजाने, भीड़ पर काबू पाने, गडिडएं दी आओजाई दी बवस्था ते होर केई सारी कारवाइएं गी अंजाम देने दा अभ्यास कीता गेआ।

<><><><><><>

Cricket

क्रिकेट च एंडरसन-तेंदुलकर ट्रॉफी दे त्रीए टैस्ट मैच दे चौथे ध्याड़े अज्ज मेजबाल इंगलैंड भारत खलाफ अपनी दूई पारी च बिजन कुसै नुक्सान दे 2 रंजें थमां अगगे खेडोग। मैच भारतीय समें मताबक साढ़े 3 बजे शुरू होग। एहदे शा पैहले पैहली पारी च इंगलैंड दे 387 रंजें दे परते च भारतीय टीम बी 387 रंज पर आउट होई गई। 5 टैस्ट मैचें दी श्रृंखला इसले 1-1 कन्नै बरोबरी पर ऐ। भारत लेई के.एल.राहुल नै शतक बनाया। ऋषव पंत नै 74 ते रविन्द्र जडेजा नै 72 रंजें दा योगदान दित्ता।

<><><><><><>

Read by Pankaj Kohli

Composed Mukesh Gupta

Editor Abhilasha Sharma

Skilled Rajat